

DIE LEWE is 'n reis

Christus te midde van die wysbegeerte en eerste beginsels van die wêreld

Theo Badenhorst

"Om te reis is om te lewe,"
sê dr Theo Badenhorst van die
NG kerk La Rochelle, Bellville.

Die lewe staan nie stil nie, of liever: Dit is nie gegee om stil te staan nie. Maar waarheen is ons op pad? Of is mense reisigers na nêrens ?

Denkers het die werklikheid al beskou as ewige vloei of spontane wording. Ander het te midde van al die verandering klem gelê op 'n vaste, blywende beginsel wat die werklikheid met al sy wisselinge dra. 'n Ander moontlikheid is die mite van die ewige terugkeer wat deur verskillende samelewings gehuldig is. Alles wat is, was reeds en alles wat was, kom weer. Iets van die geloof in reïnkarnasie lê ook daarin opgesluit. Die filosofie van die ewige vloei is ook al deur 'n Griek uitgedruk as 'alles draai'. Die ewige terugkeer sou dan beteken 'alles draai terug'. Dit sou ook beteken daar is niks werklik nuut nie, soos ook die geval met 'n onbeweeglike, vaste beginsel. Of is so 'n beginsel God? Of anders: Wat sou die Prediker bedoel as hy sê daar is niks nuuts onder die son nie?

Die Bybel vertel verder dat God sê dat Hy alles nuut maak. Daarteenoor is ons gewone ervaring dat alles wat eens nuut was, verouder, maar God sê Hy maak alles nuut. Die nuwe of novum, sê die ateïstiese Joodse filosoof Ernst Bloch in die twintigste eeu, is 'n idee waarmee filosofe eintlik nie werk nie. Hulle bly by die ewig vloeiende of ewig vasleggende (die ewigheidsdenke kan ons sê) - deur die kritiese en analitiese twintigste-eeuse denkrigtings heen. Maar

Bloch tref die idee van die nuwe aan in die Bybel van Jode en Christene en dit fassineer hom oorweldigend. In die Bybel is die verwagting van die nuwe volgens hom steeds lewend. Hoe Bloch daaruit sin kon maak sonder God is natuurlik 'n ander vraag.

Selfs in die idee van die ewige vloei is daar nie ruimte vir wat werklik nuut is nie. Die vloei word nie gestuit of radikaal van koers af gestuur nie; dit rol maar net aan soos branders. Maar die God van die Bybel is die God van verrassings. Hy vang ons telkens op die verkeerde voet, en Hy vang ons dikwels so met sy genade. Sy genade is vir ons dikwels te groot en te veel. Ons wil hê genade moet maar altyd sag wees en nie ons rus verstoor nie, maar God se genade stuur ons gewoonlik op 'n koerswysiging.

In die Ou Testament het God reeds die nuwe beloof: 'n Nuwe hemel en 'n nuwe aarde, ook 'n nuwe Dawid - wat die eerste Dawid ver sou oortref. En toe die nuwe Dawid kom, was die volk Israel alles behalwe reg vir Hom. Vir die stoere Jood Saulus Paulus was hierdie nuwe Dawid een te veel. Hy sou Hom in elk geval nie eers as die nuwe Dawid herken het nie. Vir Paulus was daar te veel genade in Jesus, die nuwe Dawid, genade vir die onverdienstelikes wat nie getroue Jode soos hy was nie. Jesus het begin om die aarde nuut te maak met 'n nuwe gees (Gees) en bewussyn. In Hom was "al die verborge skatte van wysheid en kennis te vind".

Laasgenoemde is natuurlik aanstootlik vir die gangbare wysgerige denke, vir sowel die ewige beginsel- as die ewige vloei-denke. Die ewigheidsdenke sal byvoorbeeld wil vra: Hoe kan iemand wat eenmaal in duisende jare verskyn het, beslissend wees vir die hele geskiedenis van die mensheid? Vir daardie soort denke is Jesus maar een moment in die verbygaande vloei van alle dinge. Ook die kringe van die Hindoeïsme en die Boeddhisme sal Hom waarskynlik so sien, die kringe waar die ewige terugkeer 'n groot rol speel.

Ook die Westerling GE Lessing het in die agtiende eeu in lyn met die ewigheidsdenke gesê: "Toevallige geskiedeniswaarhede kan nooit die bewys van ewige redewaarhede word nie." Daarom was alle gelowe vir hom ook in beginsel gelyk.

Milan Kundera sien in sy *The Unbearable Lightness of Being* 'n bepaalde waarde in die mite van die ewige terugkeer. Hy meen as iets of iemand net eenmaal verskyn, dan is hierdie verskyning baie vlietend. Mense vergeet die impak daarvan. Kundera neem Hitler as voorbeeld. As so 'n monster van 'n mens net eenmaal verskyn, leer ons volgens hom nie werklik om sulke verskynings later weer raak te sien nie.

En Jesus? Die sentrum van sy persoon lê in sy kruisiging en opstanding. Tog word sy kruisoffer in die Roomse mis voortdurend herhaal om dit aan mense oor te dra. En Protestante word in die Woordverkonding en in die sakramente voortdurend herinner aan en aangespreek deur daardie offer ter wille van ons. Jesus Christus word as 't ware in die erediens van die kerk (en ook op ander maniere) by herhaling teenwoordig gestel. Kry ons hier iets van die ewige terugkeer? Ek meen nie.

Die antwoord lê myns insiens in die opstanding van Christus. Sy opstanding veroorsaak dat Hy self lewend in die Woordverkondiging (so ook in die lees van en nadenke oor die Bybel), sowel as in die sakramente teenwoordig is. Maar ook dit is nie 'n ewige herhaling nie. Die verskyning van Jesus Christus is nie maar 'n moment in die verbygaande stroom van tyd nie. Dit is die vervulling van God se beloftes. Sy koms is iets wat in die belofte lank reeds teenwoordig was.

Toe Hy uiteindelik verskyn het, is die beloftes vervul, maar op 'n baie sonderlinge manier. Sy verskyning was swanger van nog meer

belofte. Waar sy dood deur sy volgelinge in die nagmaal herdenk word, gebeur dit met die oog op sy tweede en finale koms – totdat Hy kom, in Paulus se woorde . Maar dit is juis moontlik omdat Hy uit die dood opgestaan het en leef, en so steeds lewend teenwoordig is waar sy evangelie spreek en die sakramente gevier word.

Die verskyning van Jesus Christus is nie maar 'n moment in die verbygaande stroom van tyd nie. Dit is die vervulling van God se beloftes.

Maar hierdie lewende teenwoordig wees van die gekruisigde Christus het 'n trekkrag vorentoe, totdat Hy weer kom, om alles nuut te maak. Die verskyning van Jesus Christus in die verlede het God se nuutmaakplan (of sy koninkryk) laat inbreek in ons wêreld, sodat die wêreld nou gelei word na die volstrek nuwe toe.

Wat met Christus se verskyning gebeur het – en wat vir die gangbare, logiese denke irriterend is – is dat in daardie kort lewe die konsentrasiepunt van die hele geskiedenis plaasgevind het. Was dit die ongeveer 33 jaar van Jesus se lewe, of die drie jaar van sy openbare optrede, of die ongeveer ses ure aan die kruis? Dit maak nie werklik saak nie. Wat is dit teenoor duisende, selfs honderde duisende jare?

In die verskyning van Jesus Christus is die ganse werklikheid gekonsentreer, by name in sy kruisiging en opstanding. Sy koms het 'n oordeel gevel oor die tyd wat verby was en belofte gegee vir die tyd wat kom, selfs ook belofte vir die tyd wat toe reeds verby was. Dit was 'n oordeel selfs ook oor die tyd wat daarna sou kom, sodat mense se dwaasheid, wreedheid en onreg ook verby ons dag die toekoms in onder die oordeel kom. Ook ons aardse toekoms is in 'n sekere sin nog ou tyd, omdat die ou dinge van die mens se sondigheid nog nie opgehou het nie. Maar dit alles is tot 'n einde gestel, omdat die nuwe reeds daar ingebreek het.

In daardie een moment van Jesus se verskyning is God se openbaring gekonsentreer.

Natuurlik het sy openbaring in die vroegste tye begin en dit gaan oor Jesus van Nasaret heen, maar met Jesus se koms is die volheid van sy openbaring ingegiet in ons werklikheid, sodat die hele geskiedenis (met die toekoms daarby) daarin saamgevat word.

42

Hierdie openbaring het dan so plaasgevind dat die nuwe in die ou wêreld van onreg en verval inkom. Daarmee word die werklikheid vorentoe getrek in die rigting van God se volstrek nuwe.

Die gewone, logiese denke het ook nie plek vir die werklikheid van die sonde wat die skepping kom versteur het nie. In daardie denke is die sonde gewoonlik 'n negatiewe pool wat die positiewe balanseer. Maar God se nuwe oortref die oue, die sondige

bedeling, sodat daar 'n meerwaarde aan die nuwe is. God se nuwe het aangebreek om die versteuring reg te stel, maar op so 'n manier dat dit nie maar net vervloë tye herstel nie. Sy ingrype in Christus doen meer as dit. Dit vat ons verder as die werklikheid wat was.

Jy vra dalk: Wat van al die letsels van die oue wat nog aan die nuwe werklikheid kleef?

Om in Jesus Christus te glo, om in die geloof aan Hom verbind te wees, beteken dat die ou wêreld vir jou vernietig is, al smeul die rook nog en al is daar nog baie opruimingswerk. Maar nou is jy opgeneem in die kragveld van die nuwe om uit daardie kragveld te leef en jou energie daaruit te ontvang. Jy kan - saam met die ander volgelingen van Christus - meer van die nuwe wat op pad is, sigbaar maak.

Daarom is dit nie vreemd nie dat Jesus Homself die weg, die waarheid en die lewe noem. Jesus Christus self is die pad, die weg vorentoe. Omdat die lewe 'n reis is na God se volstrek nuwe, is die lewe 'n nuut-wordende lewe saam met Hom.

**Jesus Christus self
is die pad, die
weg vorentoe.
Omdat die lewe
'n reis is na God
se volstrek nuwe,
is die lewe 'n
nuutwordende
lewe saam met
Hom.**

